



TEKS UCAPAN
YAB DATUK SERI UTAMA HJ SULAIMAN BIN MD ALI
KETUA MENTERI MELAKA
SEMPENA
PERASMIAN SAMBUTAN HARI BELIA NEGARA 2021
PERINGKAT NEGERI MELAKA

TARIKH: 5 DISEMBER 2021 (AHAD), MASA: 8.30 MALAM,
DI RAJA CHULLAN *BALLROOM*, HOTEL AMES, MELAKA
(WAKIL : YB TUAN VP SHANMUGAM A/L V. PITCHAY)

Salam Sejahtera, dan Salam Melakaku Maju Jaya,
Rakyat Bahagia, Menggamit Dunia.

**YANG BERHORMAT DATO' TS. KAMEL MOHAMAD,
SETIAUSAHA KERAJAAN NEGERI MELAKA;**

**YANG BERBAHAGIA DATUK MOHD RIDHWAN BIN MOHD
ALI,
PRESIDEN MAJLIS GABUNGAN BELIA MELAKA;**

**YANG BERUSAHA ENCIK NOORMAN BIN RAMLAN,
PENGARAH JABATAN BELIA DAN SUKAN NEGERI
MELAKA;**

**SETERUSNYA, KETUA-KETUA JABATAN PERINGKAT
NEGERI DAN PERSEKUTUAN;**

**YANG BERBAHAGIA DATUK-DATUK, DATIN-DATIN;
RAKAN-RAKAN MEDIA, TUAN-TUAN, PUAN-PUAN,
HADIRIN DAN HADIRAT YANG DIHORMATI SEKALIAN,**

MUKADIMAH

1. Pertamanya, saya berasa gembira kerana kita dapat bersama-sama berkumpul pada petang ini sempena **Majlis Perasmian Sambutan Hari Belia Negara (HBN) Peringkat Negeri Melaka bagi tahun 2021.**
2. Di kesempatan ini, bagi pihak YAB Datuk Seri Utama Haji Sulaiman bin Md Ali, Ketua Menteri Melaka, saya merakamkan ucapan setinggi-tinggi penghargaan kepada Jabatan Belia dan Sukan Negeri Melaka dan

Majlis Gabungan Belia Melaka (MGBM) atas jemputan untuk merasmikan sambutan ini. Saya juga ingin menyampaikan salam takzim daripada YAB Ketua Menteri Melaka, kerana tidak dapat bersama di majlis ini disebabkan ketentuan lain yang telah diatur terlebih dahulu.

3. Walaupun kita masih berhadapan dengan cabaran pandemik COVID-19 yang masih belum berakhir, namun kerajaan tetap mengadakan sambutan Hari Belia Negara (HBN) bagi mengiktiraf seterusnya mengangkat martabat golongan belia di negara ini khususnya di Negeri Melaka.

Saudara dan saudari para belia yang dihormati sekalian,

PERASMIAN HARI BELIA NEGARA 2021 PERINGKAT NEGERI MELAKA

4. Saya difahamkan, Sambutan Hari Belia Negara Peringkat Negeri Melaka pada tahun ini masih bertemakan '**Dekad ini, Dekad Anda**'. Tema ini dipilih bertujuan untuk meneruskan legasi Hari Belia Negara sebelum ini agar terus menjadi pendorong kepada generasi belia khususnya di Negeri Melaka supaya lebih bersemangat dan komited dalam merencanakan kepimpinan masa depan golongan tersebut.

5. Sambutan ini menjadi bukti akan pengiktirafan kerajaan terhadap sumbangan, komitmen, kecemerlangan dan daya usaha seluruh warga belia di negara ini khususnya di Negeri Melaka. Saudara dan saudarilah yang membentuk hampir **68 peratus** daripada populasi tenaga kerja negara. Saudara dan saudarilah juga yang mewakili hampir **47 peratus** daripada keseluruhan populasi penduduk Malaysia.

Saudara dan saudari para belia sekalian,

6. Belia bukan sahaja menjadi aset yang sangat berharga kepada negeri dan negara, malah saudara dan saudari adalah cerminan dan citra masa depan negeri dan negara.
7. Oleh sebab itu, kerajaan hari ini mengambil pendekatan melaksanakan tanggungjawab bersama rakyat khususnya belia, lantaran peranan penting yang dimiliki belia dalam menentukan kejayaan setiap agenda pembangunan negara.
8. Kerajaan Negeri dengan kerjasama Kementerian Belia dan Sukan (KBS) tidak memandangkan pandemik ini sebagai satu titik noktah untuk belia tidak bergiat

aktif dalam menjalankan program dan khidmat kepada masyarakat. Sebaliknya, banyak program yang masih dapat dilakukan oleh para belia menerusi persatuan belia setempat demi membantu menyalurkan sumbangan kepada mereka yang terjejas dan memerlukan.

9. Saya dimaklumkan, menerusi statistik yang dikeluarkan oleh pihak Institut Penyelidikan Pembangunan Belia Malaysia (IYRES) menyatakan, belia Melaka yang berumur **15-40 tahun** adalah seramai **419,700** orang yang merangkumi **8 Kumpulan Sasaran Belia** yang terkandung di dalam buku Dasar Belia Malaysia.

10. Oleh yang demikian, kelompok belia ini amatlah penting sebagai aset negara dan segala usaha bagi meningkatkan potensi, penyerlahan bakat, pengukuhan jati diri, penyegaran pemikiran dan keterampilan kepimpinan perlu dibina dan ditingkatkan.

Saudara dan saudari para belia yang dihormati sekalian,

MEMPERSIAP DIRI MENERIMA PERUBAHAN

11. Kerajaan sebelum ini telah meminda Akta Pertubuhan Belia dan Pembangunan Belia 2007 (yang dikenali sebagai Akta 668) dengan menurunkan julat usia belia

daripada **15 hingga 40 tahun** kepada **15 hingga 30** tahun.

12. Pindaan ini selaras dengan **Konsep I: Had Umur Setara Piawaian Antarabangsa** yang terkandung di dalam buku Dasar Belia Malaysia yang akan membantu mengurangkan jurang antara generasi serta dapat mempercepatkan proses kematangan golongan belia ke arah transisi belia dewasa.
13. Pada tahun 2019 pula, Perlembagaan Persekutuan (**Perkara 119**) turut dipinda bagi membolehkan had umur mengundi diturunkan daripada **21 tahun ke 18 tahun** dan pendaftaran pemilih secara automatik dilakukan. Untuk itu, para pemimpin belia sedia ada, perlu menyediakan pemimpin pelapis yang berkaliber,

sekali gus mempersiapkan diri mendepani cabaran kepimpinan negara yang lebih luas setelah melepasi had usia seperti ditetapkan.

Saudara dan saudari para belia yang dihormati sekalian,

ANUGERAH PERDANA BELIA NEGARA PERINGKAT NEGERI MELAKA 2021

14. Majlis sambutan pada petang ini juga akan menyaksikan seramai **enam** individu yang akan menerima **Anugerah Perdana Belia Negara 2021** Kategori Individu Lelaki & Kategori Individu Wanita serta Kategori Pertubuhan Belia. Sebenarnya kita memiliki ramai lagi warga belia yang membanggakan negara khususnya di Negeri Melaka.

15. Oleh itu, Anugerah APBN ini adalah sebagai platform untuk meraikan dan mengiktiraf golongan belia serta memberi penghargaan kepada individu dan pertubuhan belia yang telah memberi sumbangan besar kepada pembangunan belia di Negeri Melaka di samping memberi galakan penglibatan belia dalam kerja-kerja sukarela dan menyumbang kepada masyarakat.

16. Komitmen saya selaku Pengerusi Jawatankuasa Negeri Pembangunan Belia, Sukan dan Badan Bukan Kerajaan (NGO), bertekad akan terus memberikan sokongan dan dokongan kepada pembangunan belia di negeri ini. Besar harapan saya agar golongan belia di negeri ini akan terus memainkan peranan untuk membantu Negeri Melaka menjadi sebuah negeri yang

berdaya saing dari segi sosio-ekonomi setanding negara maju yang lain.

Saudara dan saudari para belia yang dihormati sekalian,

PENUTUP

17. Akhir kata, saya sekali lagi mewakili YAB Ketua Menteri Melaka merakamkan ucapan setinggi-tinggi penghargaan kepada semua pihak yang telah bersama-sama berganding bahu bagi memastikan Negeri Melaka menjadi negeri belia.
18. Dengan sukacitanya, saya merasmikan Sambutan Hari Belia Negara Peringkat Negeri Melaka bagi tahun 2021.

Sekian, Terima Kasih.

